

*La composizion di Sivilotti e Stroili si pues discjamâ dal sît [www.arlef.it](http://www.arlef.it)*

## “Incuintri al doman” al è l’Imni uficiâl dal Friûl

“Incuintri al doman”, l’imni uficiâl dal Friûl, al è stât presentât al public sabide ai 6 di Otubar dal 2018 intal Domo di Lignan.

L’imni, musicât dal mestri Valter Sivilotti e scrit di Renato Stroili Gurisatti, al è stât eseguit de Mitteleuropa Orchestra, direzude dal mestri Marco Guidarini. La esecuzion vocâl e je stade assegnade al Coro del Friuli Venezia Giulia, direzût dal mestri Cristiano dell’Oste. Prime dal Imni e je stade eseguide la Novesime sinfonie di Beethoven, che e conten l’“Imni ae gjonde”, o ben l’Imni de Europe Unide.

La esecuzion a Lignan e je stade l’at conclusif di un concurs promovût dal Istîtût Ladin Furlan “Pre Checo Placerean” e dal Messaggero Veneto, in colaborazion cu la ARLeF - Agenzie Regjonâl pe Lenghe Furlane. Il toc vincidôr al jere stât anunziât in ocasion de Fieste de Patrie dal Friûl, che si è tignude a Volesson Darzin ai 8 di Avrîl dal 2018.

*“O vevi tal cjâf cheste melodie za di un pâr di agns - al à contât il compositor Valter Sivilotti, autôr des musicis -. Mi pareve significative pal nestri teritori e une vore “intonade” cun chel. Mi soi confrontât cul leterât Renato Stroili Gurisatti che al à condividude la mê prime impression. Cussì, tal moment dal Concors organizât de ARLeF, o ai presentade la composizion che e je plasude ançe ae jurie. Un imni al à la sô metriche e mi pâr di vê lavorât suntun teme nobil, cuntun andament mitteleuropean che al caraterize cheste nestre region”.*

L’imni al è stât selezionât di une jurie di esperts - cun a cjâf il compositor di nivel internazionâl Azio Corghi, e componude di Marco Maria Tosolini, Alessio Screm, Chiara Vidoni



*Di man çampe: Renato Stroili Gurisatti, il mestri Valter Sivilotti e il diretôr de Mitteleuropa Orchestra, Marco Guidarini*

e William Cisilino - che lu à valutât tant che chel plui meritevol fra i dîs presentâts, marcant che “la musiche e il test si integrin a vicende, midiant di une scriture vocâl e strumentâl di grant respîr e di slanç di cjant potent”.

I spartîts di “Incuintri al doman” - che a son disponibii in dodos declinazions (orchestre, bande, corâls, e v.i.) - e l’audio e il video de esecuzion si podaran discjamâ tal sît: [www.arlef.it](http://www.arlef.it)

### Incuintri al doman

**In alt o fradis, o int di Aquilee,  
 devant da la Storie, di front dal doman.  
 Sin flame che e vîf pes stradis dal mont  
 sin non di une Patrie, sin fis dal Friûl.**

**Scolte o Friûl, o tiere di libars,  
 di lenghis e popui sês cjase di pàs.  
 Dai secui i paris nus clamin adun  
 a fâsi lidris di un unic destin.**

**In alt o Friûl, o Patrie mê sante,  
 di fuarce e sperance si viest la tô int.  
 Un popul sigûr che al cjamine te lûs  
 incuintri al doman, incuintri ai siei fis.**

**MUSICHE Valter Sivilotti  
 PERAULIS Renato Stroili Gurisatti**



*Di man çampe: Daria Miani e Chiara Donada*

Tierce stagjon dal program dut in lenghe furlane coprodusût de ARLeF e di Telefriuli

## Fruts, al è tornât MAMAN!

Maman! al è il program televisif par fruts dut in lenghe furlane, risultât di une coproduzion de ARLeF - Agenzie Regjonâl pe Lenghe Furlane e di Telefriuli, che al nas cul intindiment di meti in contat i fruts cul plurilinguism. Dopo dal grant sucès des edizions stadis, la tierce stagjon de transmission e je tacade ai 12 di Otubar.

Condutoris e coautoris de stagjon televisive a son di gnûf **Daria Miani** e la atore **Chiara Donada**. Insieme a intrategnin i fruts cun zûcs, curiositâts e contis bielonis, compagnadis des cjançons originjals scritis di Daria Miani e metudis in musiche di Flaviano Miani.

Cun lôr a tornin ogni setemane ançe il tenar giatut Vigji e il carton animât “Tui e Tuie”, doi giatuts cetant ninins, ma un pôc pastrocjons che a àn apassionât i piçui spetatôrs te stagjon passade.

Si trate di une serie che è a vût cetant sucès – lade in onde in Australie e in Gнове Zelande su Disney Channel - che e je stade dopleade di pueste par furlan in graciis de ARLeF. La regjie di Maman! e je di Tommaso Ravo, e il coordinament generâl di Vittorio Vella.

**Lis pontadis di Maman! si puedin discjamâ dal sît de ARLeF, te sezion VIDEO: [www.arlef.it](http://www.arlef.it)**